

Nino Schurter triumfescha a Cairns

■ (rtr) Il mountainbiker Nino Schurter ha cumenzà la nova stagiun sco quai ch'el ha terminà la davosa stagiun, numnadamain cun ina victoria.

Il Grischun ha gudagnà l'emprima cursa da la cuppa mundiala a Cairns en l'Australia. Schurter ha triumfà avant ils dus Franzos *Maxime Marotte* e *Julien Absalon*. Nino Schurter ha ina giada dapli demonstrà sia gronda classa en la disciplina cross-country. Il campiun mundial da Tersnaus è stà a Cairns a la testa da la partenza fin l'arrivada ed ha la finala gudagnà cun in avantatg da trais secundas sin Marotte. Absalon sco terz ha pers 27 secundas. Sper Schurter è il Franzos Absalon stà il grond victur dal di. Il dubel campiun olympic ha gi in defect gia en l'emprima runda, pers

uschia bun ina minuta e crudà ord ils top 30. Absalon ha però demonstrà ch'el tuga anc adina tranter la crème de la crème en la scena da mountainbike. Il Franzos ha surpassà in suenter l'auter e la finala anc pudì far il pass sin il podest sco terz. Sper Schurter han anc tshintg ulteriurs mountainbikers svizzers fatg ina buna figura a Cairns. *Mathias Flückiger* ha manchentà be per 12 secundas in plaz sin il podest ed è vegnì quart. 5avel è *Florian Vogel*, 6avel, *Lars Forster*, 7avel *Matthias Stirnemann* ed 8avel *Fabian Giger*. La proxima cursa da la cuppa mundiala è ils 22 da matg ad Albstadt en la Germania. Il punct culminant da l'onn è lura ils 21 d'avust. Lura stat sin il program la cursa olimpica a Rio de Janeiro.



Nino Schurter para gia dad esser pront per ils gieus olimpics a Rio.